

## "PATH '09 u Federaciji BiH i Distriktu Brčko "



Alat za ocjenu izvedbe za poboljšanje kvalitete u bolnicama  
(The **P**erformance **A**ssessment **T**ool for quality improvement in **H**ospitals)

U organizaciji Federalnog ministarstva zdravstva BiH i Agencije za kvalitet i akreditaciju u zdravstvu u FBiH (AKAZ), 22. maja/svibnja 2009. godine u Sarajevu je održana konferencija "PATH '09 u Federaciji BiH i Distriktu Brčko ".

Osim predstavnika organizatora, konferenciji su prisustvovali predstavnici bolnica i kantonalnih ministarstava zdravstva, kao i gosti/učesnici iz Slovenije, Hrvatske i Crne Gore.

Konferenciju je otvorila prim. dr Marina Bera pomoćnica federalnog ministra zdravstva, nakon čega se pozdravnim govorom konferenciji obratio prim. Dr Zoran Riđanović naglašavajući značaj ovog projekta za naše bolnice i ističući da je ovo svojevrsan historijski događaj, jer naše bolnice po prvi put organizirano i sistematično počinju prikupljati podatke za indikatore bolničke izvedbe, što treba da rezultira akcijama za ukljanjanje slabosti na koje indikatori ukažu. Konferenciju je također pozdravio i predstavnik ureda SZO u BiH mr. sci. med. Ahemd Novo koji je učesnicima zaželio uspješan rad.

Predstavnik AKAZ-a i član PATH koordinacionog tima za FBiH i Distrikt Brčko, Salih Valjevac prisutnima je predstavio PATH projekt. Učesnici su mogli saznati o svrsi projekta i njegovom razvoju, i konceptu i značaju naročito za bolnice koje su u ranoj fazi uspostavljanja sistema ocjene i aktivnosti na poboljšanju izvedbe. Nakon toga je prim. dr Marina Bera predstavila PATH indikatore s posebnim osvrtom na značaj za unapređenje kvaliteta zdravstvenog sistema čiji su bolnice integrativni dio koji značajno doprinosi njegovoj izvedbi.

Prim. mag. sci. med. Miran Rems, PATH bolnički koordinator Opće bonice Jesenice (R Slovenija), predstavio je iskustva u Sloveniji sa prethodnim ciklusom PATH projekta i planove za PATH'09. Istaknuto je da će u PATH'09 učestvovati sve bolnice u Sloveniji. Dr Rems je u direktnom razgovoru sa zainteresiranim učesnicima odgovorio na brojna pitanja vezana za praktičnu implementaciju projekta u bolnicama.

Doc. dr. sc. Jasna Mesarić, PATH državni koordinator za R Hrvatsku, prezentirala je iskustva sa ulaskom hrvatskih bolnica u PATH'09 projekat. Iskazana je zainteresiranost i za saradnju na regionalnoj razini.

Doc. dr Semra Čavaljuga sa Medicinskog fakulteta Univerziteta u Sarajevu održala je kratko predavanje o principima menadžmenta kvalitete u zdravstvu, s posebnim akcentom na indikatore izvedbe i kvalitet podataka, nakon čega je prof. dr Zijad Bešliagić, PATH koordinator za Opštu bolnicu Gračanica, prikazao svoje viđenje javnozdravstvenog aspekta PATH'09 bolničkih indikatora.

Konferencija je zatvorena usvajanjem prijedloga [Strateške poruke](#) u kojoj su sadržani i zaključci konferencije. Konferencija je, od strane učesnika, ocijenjena kao vrlo uspješna.

Nakon konferencije slijedio je i radni sastanak PATH bolničkih i koordinacionog tima za Federaciju BiH i Distrikt Brčko.

Sljedećih 10 bolnica već se uključilo u PATH'09: *Kantonalna bolnica "Dr Irfan Ljubijankić" Bihać, Univerzitetski klinički centar Tuzla, Opšta bolnica Gračanica, Kantonalna bolnica Zenica, Opća bolnica Tešanj, JU Bolnica Travnik, Sveučilišna klinička bolnica Mostar, RMC «dr. Safet Mujić» Mostar, OB "Prim. dr Abdulah Nakaš" Sarajevo i Bolnica Brčko distrikta BiH.*

Koordinaciju PATH'09 projekta za FBiH i Distrikt Brčko vršit će *Salih Valjevac* iz Agencije za kvalitet i akreditaciju u zdravstvu u FBiH i *Elma Sokić Begović* iz Federalnog ministarstva zdravstva.

Na sastanku je usvojen odabir indikatora prve faze PATH'09 projekta za koje će bolnice prikupljati podatke. Bolnički PATH koordinatori i koordinacioni tim za Federaciju BiH i Distrikt Brčko diskutirali su o pojedinim aspektima indikatora, naročito o praktičnim pitanjima vezanim za prikupljanje i analizu podataka. Dogovoreno je da PATH bolnički koordinatori izvrše analizu bolničkih informacionih sistema kako bi se odredio obim u kojem će se podaci prikupljati, a da PATH koordinacioni tim za Federaciju BiH i Distrikt Brčko u međuvremenu pripremi obrasce za prikupljanje podataka sa pisanim uputstvima na osnovu informacija dobijenih iz bolnica.